

Na osnovu člana 23 Statuta Brčko Distrikta BiH ("Službeni glasnik Brčko Distrikta BiH" broj 1/00) Skupština Brčko Distrikta na 54. sjednici održanoj 13. decembra 2002. godine, usvaja

Z A K O N O SOCIJALNOJ ZAŠTITI BRČKO DISTRIKTA

I. OSNOVNE ODREDBE

ČLAN 1

Ovim zakonom uređuju se načela zaštite starih, iznemoglih i drugih lica u stanju socijalne potrebe, najmanji obim prava na određene oblike socijalne zaštite i uslovi za njihovo ostvarivanje osnove organizacije u oblasti socijalne zaštite i finansiranje te djelatnosti, kao i druga pitanja od značaja za ostvarivanje socijalne zaštite građana Distrikta (u daljem tekstu: Distrikta).

ČLAN 2

Socijalna zaštita je, u smislu ovog zakona, organizovana djelatnost usmjerena na suzbijanje i otklanjanje uzroka i posljedica stanja socijalne potrebe u svim oblastima društvenog života, rada i pružanja pomoći građanima i njihovim porodicama kada se nađu u takvom stanju.

Socijalnom potrebom smatra se stanje u kojem je građaninu ili porodici neophodna pomoć u cilju savladavanja socijalnih teškoća i zadovoljavanja osnovnih životnih potreba.

ČLAN 3

U skladu s načelima uzajamnosti i solidarnosti socijalna zaštita sprovodi se:

- Otkrivanjem, praćenjem i proučavanjem uzroka koji dovode do stanja socijalne potrebe;
- Sprečavanjem nastajanja uzroka koji izazivaju stanje socijalne potrebe;
- Otklanjanjem stanja socijalne potrebe, stvaranjem uslova za samostalan život i osposobljavanjem za rad lica koja se nađu u stanju socijalne potrebe;
- Osiguranjem neophodnih sredstava za život licima u stanju socijalne potrebe;
- Pružanjem usluga socijalnog i drugog stručnog rada;
- Preduzimanjem drugih mjera radi ostvarivanja ciljeva socijalne zaštite.

ČLAN 4

Socijalna zaštita osigurava se građanima Distrikta koji su nesposobni za rad, koji nemaju sredstava za život i srodnika koji su zakonom obavezni i u mogućnosti da im osiguraju izdržavanje, građanima i porodicama koji svojim radom i po osnovu rada, kao i po osnovu imovinskih prava usljed posebnih okolnosti ne mogu da osiguraju dovoljno sredstava za zadovoljavanje životnih potreba.

ČLAN 5

Nosioci socijalne zaštite podstiču razvoj socijalne zaštite, organizovano rade na ostvarivanju njenih ciljeva, osiguravaju ostvarivanje prava na socijalnu zaštitu utvrđenih ovim zakonom uključujući i finansiranje tih prava.

Pored obaveza iz stava 1 ovog člana, nosioci socijalne zaštite mogu ustanovljavati druge oblike i prava, kao i propisivati uslove za njihovo ostvarivanje, pod uslovom da za to osiguraju potrebna sredstva.

ČLAN 6

Radi vršenja poslova i realizacije prava utvrđenih ovim zakonom osnivaju se ustanove socijalne zaštite.

Pojedine poslove iz djelatnosti socijalne zaštite mogu vršiti socijalno – humanitarne organizacije, udruženja građana i pojedini građani, kao i druge ustanove i preduzeća u skladu s ovim zakonom.

ČLAN 7

Prava iz socijalne zaštite su lična i ne mogu se prenositi.

ČLAN 8

Vrsta, oblik i obim prava iz socijalne zaštite određuju se u zavisnosti od materijalnih mogućnosti nosioca socijalne zaštite i stanja socijalne potrebe lica kojima se zaštita pruža, pri čemu se uzimaju u obzir i uslovi sredine u kojoj lica žive.

ČLAN 9

Pravo na određeni oblik socijalne zaštite, propisane ovim zakonom, ne može ostvariti lice koje ispunjava uslove za ostvarivanje takvog prava po nekom drugom osnovu.

Pravo ostvareno po ovom zakonu gubi lice koje je ostvarilo takvo pravo po nekom drugom osnovu.

ČLAN 10

Poslove i zadatke socijalne zaštite vrše stručni radnici: socijalni radnici, pravnici, psiholozi, defektolozi, pedagozi, sociolozi, ljekari i drugo medicinsko osoblje.

Ovim aktom ustanova socijalne zaštite bliže se određuju radna mjesta na kojima rade navedeni stručni radnici.

Radnici iz stava 1 ovog člana vrše poslove socijalne zaštite u skladu s principima socijalne politike, savremenim metodama socijalnog rada, dostignućima nauke i društvenog morala.

Pri vršenju poslova socijalne zaštite osigurava se čuvanje profesionalne tajne.

ČLAN 11

Nosilac socijalne zaštite na području Distrikta je Vlada Brčko Distrikta BiH (u daljem tekstu: gradonačelnik), koju će predstavljati gradonačelnik, a sredstva za ostvarivanje prava iz socijalne zaštite osiguravaju se iz budžeta Distrikta.

DEFINICIJE

ČLAN 12

Maloljetnikom bez roditeljskog staranja smatra se lice bez oba roditelja, nepoznatih roditelja, napušteno od roditelja, roditelja lišenih roditeljskog prava i roditelja spriječenih da vrše roditeljsku dužnost.

ČLAN 13

Maloljetnikom ometenim u fizičkom ili psihičkom razvoju smatra se lice sa: oštećenjem čula vida ili sluha, poremećajem u govoru i glasu, tjelesnim oštećenjem, psihičkom zaostalošću ili s kombinovanim smetnjama.

ČLAN 14

Odgojno zanemareni maloljetnik je lice koje zbog nedovoljnog nadzora i brige roditelja, te negativnog uticaja sredine narušava općeprihvaćene društvene norme ponašanja.

Odgojno zapušteni maloljetnik je lice koje svojim ponašanjem u većoj mjeri narušava općeprihvaćene društvene norme i vrši prekršaje ili krivična djela.

ČLAN 15

Maloljetnikom čiji je razvoj ometen porodičnim prilikama smatra se lice čiji roditelji zbog nesređenih porodičnih odnosa, zlostavljanja, materijalnih ili drugih razloga nisu u mogućnosti, da mu osiguraju normalne uslove za pravilan odgoj, fizički i psihički razvoj.

ČLAN 16

Zlostavljana djeca su maloljetnici nad kojima je nanesena fizička ili psihička bol ili oštećenje, a koje je prouzrokovalo ugrožavanje zdravlja, fizičkog i psihičkog integriteta ličnosti ili onemogućilo normalan razvoj osobe.

ČLAN 17

Materijalno neosigurano, za rad nesposobno lice smatra se odraslo lice koje nema neophodnih sredstava za izdržavanje, nesposobno je za rad i ne može da osigura sredstva za život po nekom drugom osnovu.

ČLAN 18

Starim licima bez porodičnog staranja u smislu ovog zakona smatraju se lica starija od 65 godina, odnosno koja nemaju članove porodice ni srodnike koji su po zakonu obavezni da ih izdržavaju ili ako ih imaju, da nisu u mogućnosti da izvršavaju obavezu izdržavanja.

ČLAN 19

Invalidnim licem smatra se odraslo lice kod koga, uslijed fizičkih ili psihičkih nedostataka, postoji potpuna ili djelimična nesposobnost za rad.

ČLAN 20

Lice s društveno negativnim ponašanjem smatra se lice koje se odaje besposličanju, skitnji, prosjačenju, prostituciji, alkoholizmu ili uživanju opojnih droga.

ČLAN 21

Lice kome je uslijed posebnih okolnosti potreban odgovarajući oblik socijalne zaštite, smatra se lice koje se nađe u stanju socijalne potrebe zbog pretrpljene elementarne nepogode, migracije, repatrijacije, smrti jednog ili više članova domaćinstva, povratka s liječenja, nemogućnosti zaposlenja, otpuštanja s izdržavanja kazne zatvora ili izvršenja odgojne mjere.

ČLAN 22

Zlostavljanim licem smatra se odrasla punoljetna osoba nad kojom je počinjen namjerni akt u svrhu nanošenja bola, fizičkog ili psihičkog oštećenja koje je prouzrokovalo ugrožavanje zdravlja, fizičkog ili psihičkog integriteta ličnosti.

ČLAN 23

Samohranim roditeljem smatra se roditelj koji nije u braku, ne živi u vanbračnoj zajednici s drugim roditeljem djeteta ili djece i sam brine za svoje dijete ili djecu.

ČLAN 24

Mjesečnim prihodom u smislu ovog zakona se smatra ukupan neto prihod ostvaren u toku jedne godine podijeljen na 12 mjeseci.

ČLAN 25

Prosječna plaća u smislu ovog zakona definiše se kao prosječna mjesečna neto plaća utvrđena mjesečnim statističkim izvještajem Uprave prihoda Brčko Distrikta Bosne i Hercegovine.

ČLAN 26

Porodica u smislu ovog zakona definiše se kao životna zajednica roditelja i djece i drugih srodnika.

II. KORISNICI SOCIJALNE ZAŠTITE

ČLAN 27

Korisnici socijalne zaštite u smislu ovog zakona su lica koja se nalaze u stanju socijalne potrebe:

1. maloljetnici;
 - bez roditeljskog staranja,
 - ometeni u fizičkom ili psihičkom razvoju,
 - odgojno zanemareni i zapušteni,
 - čiji je razvoj ometen porodičnim prilikama,
 - zlostavljana djeca.
2. punoljetna lica;
 - materijalno neosigurana lica, za rad nesposobna lica,
 - stara lica bez porodičnog staranja,
 - invalidna lica,
 - lica s društveno negativnim ponašanjem,
 - ostala lica u stanju socijalne potrebe kojima je zbog posebnih okolnosti potrebna socijalna zaštita,
 - zlostavljana lica,
 - samohrani roditelj.

Gradonačelnik može proširivati krug korisnika socijalne zaštite iz prethodnog stava, u skladu s planovima razvoja socijalne zaštite.

III. PRAVA IZ SOCIJALNE ZAŠTITE

ČLAN 28

Prava u socijalnoj zaštiti u smislu ovog zakona su:

1. usluge socijalnog i drugog stručnog rada;
2. novčana i druga materijalna pomoć;
3. osposobljavanje za život i rad maloljetnih lica s posebnim potrebama i odraslih invalidnih lica;
4. smještaj u ustanovu socijalne zaštite ili u drugu porodicu;
5. kućna njega i pomoć u kući.

IV. USLOVI ZA STICANJE PRAVA NA POJEDINA PRAVA SOCIJALNE ZAŠTITE

1. USLUGE SOCIJALNOG I DRUGOG STRUČNOG RADA

ČLAN 29

Uslugama socijalnog rada, u smislu ovog zakona, smatra se preventivna djelatnost, dijagnostika, tretman i savjetodavno – terapijski rad zasnovan na primjeni stručne pomoći pojedincima, porodicama i društvenim grupama da rješavaju svoje životne teškoće ili pomoć u organizovanju lokalnih i drugih zajednica da sprečavaju socijalne probleme i ublažavaju posljedice.

Pravo na usluge socijalnog rada imaju svi građani.

Gradonačelnik može, uz saglasnost Skupštine Brčko Distrikta Bosne i Hercegovine (u daljem tekstu: Skupštine), propisivati učešće građana u troškovima određenih usluga socijalnog rada koje pruža socijalna služba, a koja nisu u funkciji preventive, ostvarivanja prava iz ovog zakona i pravne zaštite porodice.

2. NOVČANA I DRUGA MATERIJALNA PRAVA

ČLAN 30

Redovna novčana i druga materijalna pomoć ima za cilj da se licima u stanju socijalne potrebe i članovima njegovog domaćinstva osiguraju neophodna sredstva za izdržavanje, kao i da se drugim licima u stanju socijalne potrebe osiguraju sredstva neophodna za ublažavanje teškoća izazvanih posebnim okolnostima.

Redovna materijalna pomoć može biti stalna ili povremena, isplaćena u novcu ili izdata u naturi. Način izmirivanja ove obaveze će regulisati Odjeljenje.

ČLAN 31

Pravo na redovnu novčanu i drugu materijalnu pomoć ima materijalno neosigurano lice pod slijedećim uslovima:

- Da ima prebivalište na području Distrikta;
- Da je nesposobno za rad;
- Da nema nikakvih prihoda;
- Da nema srodnika koji su po zakonu obavezni da ga izdržavaju ili ako ih ima da nisu u mogućnosti da izvršavaju obavezu izdržavanja.

ČLAN 32

Pravo na jednokratnu interventnu novčanu ili drugu materijalnu pomoć ima lice kojem je uslijed posebnih okolnosti potreban odgovarajući oblik socijalne zaštite, pod slijedećim posebnim uslovima:

- Da ima prebivalište na teritoriji Brčko Distrikta BiH;
- Da nema srodnika koji su po zakonu obavezni da ga izdržavaju ili ako ih ima da nisu u mogućnosti da izvršavaju obavezu izdržavanja;
- Da ima mjesečne prihode manje od 45% od prosječne mjesečne plaće;
- Ako stanje socijalne potrebe ne može biti zadovoljeno po osnovu drugog zakona ili propisa.

Jednokratna interventna pomoć ne smije preći iznos redovne novčane i druge materijalne pomoći isplaćene u tekućem mjesecu u skladu s ovim zakonom i može biti dodijeljena korisniku najviše pet puta godišnje.

Suprotno od prethodnog stava, naknada zbog smrti jednog ili više članova porodice će biti isplaćena po preminulom članu porodice samo jednom, u trostrukom iznosu redovne novčane i druge materijalne pomoći za mjesec u kome se isplaćuje.

ČLAN 33

Nesposobnim za rad smatra se lice koje ispunjava jedno od slijedećih uslova:

- Lice potpuno nesposobno za rad, prema propisima o penzijsko-invalidskom osiguranju;
- Lica starija od 65 godina;
- Samohrani roditelj koji se stara o jednom ili više djece do jedne godine djeteta;
- Žena za vrijeme trudnoće, porođaja i poslije porođaja u trajanju predviđenom po propisima o radnim odnosima;
- Lice do navršene 15-te godine;
- Lice s trajnim smetnjama u psihičkom i fizičkom razvoju.

ČLAN 34

Nesposobnost za rad iz prethodnog člana u prvostepenom postupku utvrđuje stručna ljekarska komisija koju imenuje Odjeljenje za zdravstvo, javnu sigurnost i ostale usluge građana Vlade Brčko Distrikta Bosne i Hercegovine (u daljem tekstu: Odjeljenje). Od ovog pregleda će biti izuzeta lica iz tačaka 1 i 5 prethodnog člana.

ČLAN 35

U drugostepenom postupku odlučuje stručna ljekarska komisija koju imenuje gradonačelnik.

ČLAN 36

Materijalna pomoć sastoji se od:

1. stalne osnovne novčane pomoći;
2. porodičnog doplatka;
3. doplatka za školovanje i osposobljavanje za rad djece s posebnim potrebama i punoljetna invalidna lica;
4. doplatka za njegu i pomoć od drugog lica;
5. povremene pomoći.

ČLAN 37

Stalna osnovna novčana pomoć pripada samo jednom članu domaćinstva kao korisniku pomoći, a doplaci iz tačaka 2, 3 i 4 prethodnog člana članovima domaćinstva korisnika kao sauživaocima.

Kada više članova domaćinstva ispunjava uslove za sticanje prava na stalnu osnovnu novčanu pomoć, stalna osnovna novčana pomoć pripada onom članu domaćinstva koji ima najpovoljnije uslove za sticanje ovog prava.

ČLAN 38

Domaćinstvo u smislu ovog zakona smatra se zajednica života i privređivanja članova domaćinstva i lica koja traže materijalnu pomoć.

Članovima domaćinstva iz prethodnog stava smatraju se:

1. bračni drug i dijete (bračno, vanbračno, usvojeno, pastorče i dijete bez roditeljskog staranja uzeto na izdržavanje);
2. otac i majka, očuh i maćeha, usvojlac, djed i baka (po ocu i majci) i braća i sestre korisnika.

ČLAN 39

Stalna osnovna novčana pomoć određuje se u visini od 21% od prosječne mjesečne plaće.

ČLAN 40

Korisniku stalne osnovne novčane pomoći koji se nalazi na izdržavanju kazne zatvora duže od 30 dana ne pripada stalna osnovna novčana pomoć.

Članovima domaćinstva korisnika iz prethodnog stava može se odrediti stalna osnovna novčana pomoć, ako za to postoje opravdani razlozi.

ČLAN 41

Porodični doplati pripada članovima domaćinstva korisnika stalne osnovne novčane pomoći koji su nesposobni za rad i ispunjavaju neki od uslova iz člana 33 ovog zakona i iznosi po članu domaćinstva najmanje 20% od pripadajućeg iznosa stalne osnovne novčane pomoći.

Porodični doplati ne pripada djeci korisnika stalne osnovne novčane pomoći za koju korisnik prima doplati za školovanje i osposobljavanje za rad, odnosno doplati za djecu.

ČLAN 42

Doplati za školovanje i osposobljavanje za rad pripada korisniku stalne osnovne novčane pomoći za svako dijete do navršene 26. godine života, ukoliko se nalazi na redovnom obrazovanju i odgoju i iznosi po djetetu najmanje 30% od pripadajućeg iznosa stalne osnovne novčane pomoći.

Doplati za školovanje i osposobljavanje za rad ne pripada djeci korisnika stalne osnovne novčane pomoći za koju korisnik prima doplati za djecu.

ČLAN 43

Doplatak za njegu i pomoć od drugog lica pripada korisniku stalne osnovne novčane pomoći, odnosno članu njegovog domaćinstva za koga ostvaruje porodični doplati, ako je paralizovan, obolio od distrofije i srodnih mišićnih i neuromišićnih oboljenja, teško ometen u psihičkom razvoju, slijep ili nepokretan kome je neophodna pomoć od drugog lica, a pod uslovom da nije smješten u organizaciju socijalne zaštite i iznosi za svakog člana najmanje 70% od pripadajućeg iznosa stalne osnovne novčane pomoći.

Doplatak za njegu i pomoć od drugog lica, pod uslovima iz prethodnog stava, pripada i svakom drugom licu neovisno od toga da li ispunjava uslove za materijalno osiguranje, ukoliko to pravo ne može da ostvari po nekom drugom osnovu, s tim da mu doplati za njegu i pomoć od drugog lica ne može biti veći od 50% od najvišeg iznosa doplatka za njegu i pomoć od drugog lica utvrđenog ovim zakonom.

Nalaz i mišljenje u smislu prethodnih stavova daju ljebarske komisije određene članom 34 ovog zakona.

ČLAN 44

Pravo na povremenu pomoć imaju i materijalno neosigurana lica koja su sposobna za rad, a nađu se u stanju socijalne potrebe usljed teškoća izazvanih posebnim okolnostima iz člana 21 ovog zakona, ukoliko ispunjavaju ostale uslove iz člana 32 ovog zakona.

ČLAN 45

Gradonačelnik utvrđuje uslove i kriterije pod kojima se materijalna pomoć može djelimično ili u cjelini dati u naturi.

3. OSPOSOBLJAVANJE ZA ŽIVOT I RAD MALOLJETNIH LICA S POSEBNIM POTREBAMA I ODRASLIH INVALIDNIH LICA

ČLAN 46

Osposobljavanje ima za cilj da djeci s posebnim potrebama i odraslim invalidnim licima omogući osposobljavanje za rad pod posebnim uslovima prema njihovim sklonostima i preostaloj sposobnosti.

ČLAN 47

Osposobljavanje za život i rad ostvaruju djeca ometena u psihofizičkom razvoju i odrasla lica s umanjenim psihofizičkim sposobnostima, bez obzira na uzrok nastanka invalidnosti odnosno radne nesposobnosti, ako to pravo ne mogu ostvariti po nekom drugom osnovu, a koja se prema psihofizičkim sposobnostima i godinama života, mogu osposobiti za rad.

Pravo iz stava 1 ovog člana pripada i djeci osiguranika koja su do dana stupanja na snagu ovog zakona, to pravo ostvarili po propisima iz penzijskog i invalidskog osiguranja.

ČLAN 48

Lice koje se radi osposobljavanja za život i rad upućuje na internatski smještaj ima pravo na troškove smještaja, ishrane i prijevoza.

ČLAN 49

Troškove smještaja i prijevoza snosi lice koje se smješta u internatski smještaj, roditelj, usvojitelj, staratelj ili srodnik koji je dužan da izdržava to lice ili drugo pravno ili fizičko lice koje je preuzelo ove obaveze.

Obaveza roditelja, usvojitelja, staratelja i srodnika u snošenju troškova iz stava 1 ovog člana postoji, ukoliko prihodi po članu domaćinstva prelaze visinu od 30% prosječne plaće.

Učešće lica iz stava 2 ovog člana u troškovima iz stava 1 ovog člana, utvrđuje se posebnom odlukom nadležnog Odjeljenja, u visini razlike iznosa ukupnog prihoda po članu domaćinstva i iznosi od 30% prosječne plaće po članu domaćinstva.

Troškove smještaja i prijevoza snosi budžet Distrikta u visini iznosa srazmjernog materijalnim mogućnostima lica iz stava 1 ovog člana utvrđenim na osnovu kriterija iz stavova 2 i 3 ovog člana.

4. SMJEŠTAJ U USTANOVU SOCIJALNE ZAŠTITE ILI DRUGU PORODICU

ČLAN 50

Smještaj u organizaciju socijalne zaštite ili drugu porodicu ima za cilj da licu u stanju socijalne potrebe osigura socijalnu zaštitu koja može da obuhvati stanovanje, ishranu, odijevanje, zdravstvenu i drugu negu, odgoj i osposobljavanje za rad.

ČLAN 51

Pravo na smještaj u ustanovu socijalne zaštite ili drugu porodicu priznaje se licu kome porodica ne može da osigura odgovarajuću zaštitu i licu bez porodičnog staranja kada se na drugi način ne može osigurati odgovarajuća zaštita.

Vrstu prava iz stava 1 ovog člana, na osnovu svestranog razmatranja potreba korisnika i mogućnosti njegove porodice, određuje nadležna ustanova socijalne zaštite koja rješava o pravima iz ovog zakona.

4a. SMJEŠTAJ U USTANOVU SOCIJALNE ZAŠTITE

ČLAN 52

Smještaj u ustanovu socijalne zaštite ostvaruje se upućivanjem korisnika u odgovarajuću ustanovu, u kojoj se osigurava zbrinjavanje (stanovanje, ishrana, odijevanje, njega, pomoć i staranje), odgoj i obrazovanje, osposobljavanje za određene radne aktivnosti i zdravstvena zaštita u

skladu s posebnim propisima, radno – okupacione, kulturno – zabavne i rekreativno – rehabilitacione aktivnosti i usluge socijalnog rada.

ČLAN 53

Pravo na smještaj u ustanovu socijalne zaštite ima:

1. dijete bez roditeljskog staranja i dijete čiji je razvoj ometen porodičnim prilikama i to do osposobljavanja za samostalan život, povratka u vlastitu porodicu ili zbrinjavanja u porodicu usvojioca, ili drugu porodicu, završetka redovnog školovanja, odnosno osposobljavanja za samostalan život,

2. dijete s posebnim potrebama stepena umjerene, teže i teške mentalne ometenosti, višestruko ometeno u razvoju, dijete oboljelo od autizma, kao i dijete sa smetnjama u tjelesnom razvoju koje nema uslove u svojoj porodici, dok traje potreba za ovim oblikom zaštite,

3. odgojno i zanemareno i odgojno zapušteno dijete, dok traju razlozi za smještaj,

4. trudnica i samohrana majka s djetetom do devet mjeseci života djeteta kojoj je, usljed materijalne neosiguranosti, neriješenog stambenog pitanja, poremećenih porodičnih odnosa i sličnih situacija, potrebno privremeno zbrinjavanje,

5. odraslo invalidno lice s tjelesnim i čulnim oštećenjima, teško hronično oboljelo lice i lice ometeno u mentalnom razvoju koje nije u mogućnosti da samostalno živi u porodici zbog nepovoljnih zdravstvenih, socijalnih, stambenih ili porodičnih prilika i lica s poremećajima u ponašanju,

6. stara osoba koja zbog nepovoljnih zdravstvenih, socijalnih, stambenih i porodičnih prilika nije u mogućnosti da živi sama ili u porodici.

4b. SMJEŠTAJ U DRUGU PORODICU

ČLAN 54

Pravo na smještaj u drugu porodicu imaju lica koja, u smislu ovog zakona, imaju pravo na smještaj u ustanovu.

Prilikom izbora porodice u koju se korisnik smješta, služba koja vrši smještaj rukovodit će se naročito ličnim svojstvima korisnika i članova porodice u koju se smješta, stambenim i drugim mogućnostima porodice i potrebama korisnika.

ČLAN 55

Korisnik se ne može smjestiti u drugu porodicu:

1. u kojoj je neko od članova porodice lišen roditeljskog prava ili poslovne sposobnosti,

2. u kojoj su poremećeni porodični odnosi,

3. u kojoj neko od članova porodice ima društveno neprihvatljivo ponašanje,

4. u kojoj bi, zbog bolesti člana porodice, bilo ugroženo zdravlje korisnika i ostvarivanje svrhe smještaja.

ČLAN 56

Međusobni odnosi službe koja vrši smještaj u porodicu u koju se vrši smještaj uređuje se pismenim ugovorom na osnovu rješenja o smještaju. Ugovor zaključuje Odjeljenje s jednim članom porodice, koji na taj način postaje hranitelj. Hranitelj ima pravo na naknadu za izdržavanje korisnika i naknada za rad koje se isplaćuje iz sredstava namjenjenim za ostvarivanje prava iz socijalne zaštite.

Kriterije za utvrđivanje visine naknade utvrđuje gradonačelnik.

Smještaj u drugu porodicu prestaje: sporazumom ugovornih strana, otkazom ugovora, raskidom ugovora, smrću korisnika ili smrću člana porodice koji je zaključio ugovor o porodičnom smještaju, iako više ne postoji razlog za primjenu tog oblika zaštite.

Otkaz ugovora o smještaju korisnika u drugu porodicu daje se pismeno.

Otkazni rok traje najmanje 30 dana, u kojem roku je služba dužna da licu na smještaju osigura odgovarajući oblik zaštite.

ČLAN 57

Troškove smještaja, odnosno dio troškova, u ustanovu koja pruža usluge socijalne zaštite ili u drugu porodicu, snosi korisnik zaštite, roditelj, odnosno srodnik koji je dužan da izdržava korisnika, nadležni organ ili druga organizacija i lica koja su preuzela plaćanje troškova.

ČLAN 58

Korisnik učestvuje u troškovima svim svojim prihodima i primanjima, umanjeni za iznos sredstava za lične potrebe.

U troškovima smještaja korisnika učestvuju i roditelji i srodnici obavezni na izdržavanje, osim za lica mentalno ometena u razvoju stepena teže i teške mentalne ometenosti, kao i lica višestruko ometena u razvoju s težom i teškom mentalnom ometenošću, lica oboljela od autizma i lica duševno oboljela koja su pod starateljstvom.

Licima smještenim u ustanovu socijalne zaštite koja su bez prihoda, osiguravaju se sredstva za lične potrebe, osim lica koja su teško mentalno ometena u razvoju i djetetu do sedam godina.

Kriterije i mjerila za učešće roditelja, odnosno srodnika u troškovima smještaja u ustanovu socijalne zaštite i drugu porodicu i za određivanje iznosa sredstava za lične potrebe propisuje gradonačelnik.

5. KUĆNA NJEGA I POMOĆ U KUĆI

ČLAN 59

Kućna njega i pomoć u kući je organizovano pružanje raznih usluga, kao što su: prehrana, obavljanje kućnih i drugih potrebnih poslova i održavanje lične higijene korisnicima.

ČLAN 60

Pomoć i njega u kući može se odobriti osobi kojoj je zbog tjelesnog ili mentalnog oštećenja ili trajnih promjena u zdravstvenom stanju neophodna pomoć i njega druge osobe:

- koja nema mogućnost da joj pomoć i njegu osiguraju roditelj, bračni drug i djeca,
- koja nema mogućnost da pomoć i njegu osigura iz ličnih sredstava.

ČLAN 61

Pomoć i njega u kući može obuhvatiti:

- Organizovanje prehrane (nabavka i dostava gotovih obroka u kući, odnosno nabavka živežnih namirnica, pomoć u pripremanju obroka i dr.),
- Obavljanje kućnih poslova (kao sto su: pospremanje stana, donošenje vode, ogrjeva i slično, organizovanje pranja i peglanje rublja, pranje suđa, nabavka lijekova i drugih potrepština).

ČLAN 62

Pomoć i njegu u kući pruža ustanova socijalne zaštite, a može i pravna i fizička osoba s kojom gradonačelnik sklopi ugovor.

ČLAN 63

Obaveza izdržavanja između srodnika određuje se u skladu s važećim propisima kojima se uređuju porodični odnosi.

Mogućnost izdržavanja ocjenjuje se prema prihodima srodnika obaveznog da osigurava izdržavanje, pri čemu se uzimaju u obzir njegove porodične prilike i druge okolnosti koje mogu biti od uticaja za utvrđivanje te mogućnosti.

Centar za socijalni rad rješenjem utvrđuje iznos koji je srodnik, po osnovu učešća u izdržavanju, u obavezi da osigura licu nesposobnom za rad, u skladu s kriterijima i mjerilima koje propisuje gradonačelnik.

ČLAN 64

Centar za socijalni rad ima pravo na naknadu sredstava isplaćenih na ime materijalnog osiguranja, doplatka za pomoć i njegu drugog lica, smještaja, ustanovu socijalne zaštite ili smještaja u drugu porodicu od lica koja su po zakonu dužna da učestvuju u izdržavanju korisnika, kao i od korisnika socijalne zaštite u slučaju da otuđi nepokretnu imovinu.

U slučaju smrti korisnika socijalne zaštite, Centar za socijalni rad ima pravo na naknadu iznosa isplaćenog na ime izdržavanja lica navedenih u stavu 1 ovog člana iz ostavinske mase.

Centar za socijalni rad, na osnovu pravosnažnog rješenja o priznavanju prava na socijalnu zaštitu, ima pravo na zabilježbu potraživanja u zemljišnim knjigama na nepokretnostima u vlasništvu korisnika socijalne zaštite.

Sredstva osigurana realizacijom zahtjeva iz stavova 1 i 2 ovog člana uplaćivat će se u budžet Distrikta.

ČLAN 65

Pravo na materijalnu pomoć i druge oblike socijalne zaštite može ostvariti lice koje ispunjava uslove iz člana 31 ovog zakona i uslove propisane općim aktom gradonačelnika, a ima nepokretnu imovinu koja mu predstavlja smetnju kod ostvarivanja ovih prava, ukoliko tu svoju imovinu prenese u imovinu Distrikta bez naknade, i to počevši od prvog dana narednog mjeseca od davanja pismene izjave o prijenosu nepokretne imovine. Istovremeno s prenosom imovine gradonačelnik će zaključiti ugovor o doživotnom izdržavanju s prenosiocem. Standardni uslovi pod kojima će se ugovori o doživotnom izdržavanju zaključivati bit će utvrđeni odlukom gradonačelnika.

Isplata materijalne pomoći i dugi oblici socijalne zaštite koju ostvari lice iz prethodnog stava padaju na teret budžeta Distrikta.

INSTITUCIJA REVIZIJE

ČLAN 66

Centar za socijalni rad, koji pruža usluge socijalnog rada u postupku rješavanja prava iz oblasti socijalne zaštite, može svakog trenutka izvršiti reviziju nad priznatim pravom korisnika, ukoliko dođe do promjene okolnosti koje utiču na ostvareno pravo.

V. USTANOVE SOCIJALNE ZAŠTITE

ČLAN 67

O ostvarivanju prava na socijalnu zaštitu utvrđenih ovim zakonom staraju se ustanove socijalne zaštite.

ČLAN 68

Ustanove socijalne zaštite osniva Skupština.

ČLAN 69

Ustanove socijalne zaštite mogu se osnovati u javnoj, privatnoj i mješovitoj svojini.

Aktom o osnivanju uređuju se obaveze i prava osnivača prema ustanovi, a ukoliko je više osnivača oni međusobne odnose regulišu ugovorom.

ČLAN 70

Ustanova socijalne zaštite može se osnovati, ako su pored općih uslova propisanih za osnivanje ustanova, ispunjeni i slijedeći uslovi:

- Da postoji trajna potreba za obavljanje određene djelatnosti socijalne zaštite;
- Da su utvrđeni osnovni zadaci, dugoročni ciljevi, plan i program rada ustanove;
- Da je osiguran odgovarajući prostor i oprema, za uspješan rad ustanove;
- Da su osigurani potrebni stručni i drugi radnici;
- Da je utvrđeno finansiranje i materijalna sredstva potrebna za rad ustanove;
- Da je potreban nivo kvaliteta osnivanja ustanove;
- I drugi uslovi utvrđeni zakonom.

ČLAN 71

Bliže uslove u pogledu prostora, opreme i potrebnih stručnih i drugih radnika ustanova socijalne zaštite propisuje Odjeljenje.

ČLAN 72

Ustanova socijalne zaštite koju osniva Skupština, kao i drugo pravno i fizičko lice može početi da radi i obavlja djelatnosti kada Odjeljenje utvrdi da su ispunjeni uslovi za početak rada i obavljanje djelatnosti ustanove.

ČLAN 73

Ustanove socijalne zaštite vode evidenciju o korisnicima i dokumentaciju o stručnom radu. Odjeljenje propisuje sadržaj i način vođenja evidencije i dokumentacije iz stava 1 ovog člana.

ČLAN 74

Ukoliko se u ustanovi socijalne zaštite organizuje štrajk mora se osigurati, u zavisnosti od djelatnosti, nesmetano i kontinuirano obavljanje slijedećih poslova:

1. redovna isplata novčanih primanja korisnika;
2. zbrinjavanje, ishrana i zdravstvena zaštita korisnika smještenih u socijalne ustanove.

Odjeljenje posebnim aktom utvrđuje poslove i zadatke iz stava 1 ovog člana koji moraju da se obavljaju za vrijeme trajanja štrajka, kao i način i uslovi za obavljanje tih poslova i zadataka.

ČLAN 75

Ustanove socijalne zaštite u obavljanju svoje djelatnosti saraduju s korisnikom, porodicom, građanima, ustanovama u oblasti zdravstva, odgoja, obrazovanja, osposobljavanja i rehabilitacije, organizacijama crvenog krsta, invalidskim i drugim humanitarnim organizacijama, drugim ustanovama i preduzećima, vjerskim organizacijama i fondacijama.

ČLAN 76

U cilju unapređenja oblasti i pojedinih kategorija korisnika socijalne zaštite, ustanove socijalne zaštite mogu formirati odgovarajuća udruženja.

CENTAR ZA SOCIJALNI RAD I OSTALE USTANOVE SOCIJALNE ZAŠTITE

ČLAN 77

Centar za socijalni rad je javna ustanova.

ČLAN 78

Radi obavljanja poslova neposredne socijalne zaštite, zaštite porodice, a naročito porodica sa djecom, kao i obavljanja drugih poslova utvrđenih zakonom i drugim propisima za područje Distrikta osniva se Centar za socijalni rad.

Centar za socijalni rad je javna ustanova koju osniva Skupština.

Na osnivanje, registraciju, djelatnost, prestanak rada i druga pitanja u vezi s radom Centra za socijalni rad primjenjuju se propisi o ustanovama.

Centar za socijalni rad može se osnovati ako ispunjava uslove propisane zakonom i ima najmanje četiri radnika sa završenim fakultetom ili višom školom, VII/1 ili VI/1 stepen stručne spreme: psiholog, pedagog (pedagog – psiholog), socijalni radnik, pravnik i defektolog.

ČLAN 79

U provođenju socijalne zaštite i socijalnog rada, Centar za socijalni rad vrši slijedeća javna ovlaštenja:

- rješava u prvom stepenu prava o ostvarivanju iz oblasti dječije zaštite,
- rješava u prvom stepenu prava o ostvarivanju iz oblasti porodične zaštite i starateljstva,
- pruža usluge socijalnog rada u postupku rješavanja s pravima iz oblasti socijalne zaštite,
- vrši isplatu novčanih prava utvrđenih ovim zakonom.

Centar za socijalni rad, pored poslova iz stava 1 ovog člana, obavlja i stručne poslove u provođenju socijalne zaštite i socijalnog rada, porodične zaštite i dječije zaštite:

1. otkriva i prati socijalne potrebe građana i probleme u oblasti socijalne zaštite,
2. predlaže i preduzima mjere u rješavanju stanja socijalnih potreba građana i prati njihovo izvršenje,
3. organizuje i provodi odgovarajuće oblike socijalne zaštite, dječije zaštite i neposredno pruža usluge socijalne zaštite i socijalnog rada,
4. razvija i unapređuje preventivne aktivnosti koje doprinose sprečavanju i suzbijanju socijalnih problema,
5. pruža dijagnostičke usluge, provodi odgovarajući tretman, savjetodavno-terapijske usluge i stručnu pomoć korisnicima,
6. podstiče, organizuje i koordinira profesionalni i dobrovoljni rad u oblasti socijalne zaštite,
7. radi na izvršavanju odgojnih mjera prema maloljetnim licima,
8. vodi evidenciju i dokumentaciju o pruženim uslugama i preduzetim mjerama u okviru svoje djelatnosti,
9. vrši i druge poslove utvrđene zakonom i odlukom gradonačelnika.

ČLAN 80

Odjeljenje će utvrditi normative i standarde za obavljanje poslova Centra za socijalni rad u vršenju javnih ovlaštenja.

ČLAN 81

Ustanove socijalne zaštite (u daljem tekstu: ustanove) pružaju usluge onima kojima se u cjelini ili djelimično zadovoljavaju socijalne i druge potrebe korisnika socijalne zaštite.

Ustanove se osnivaju radi zbrinjavanja određenih kategorija korisnika socijalne zaštite i obavljanja stručnih i drugih poslova socijalne zaštite.

Rad ustanova socijalne zaštite je javan.

Javnost se može isključiti u pojedinim postupcima, kada je to utvrđeno propisima o porodičnim odnosima i o krivičnom postupku.

Ustanove se osnivaju odlukom Skupštine kao:

1. centar za socijalni rad,
2. ustanove za djecu:
 - za djecu bez roditeljskog staranja,
 - za odgojno zanemarenu i zapuštenu djecu,
 - za djecu ometenu u fizičkom ili psihičkom razvoju,
3. ustanove za odrasla i stara lica,
4. ustanove za socijalno-zdravstveno zbrinjavanje invalidnih i drugih lica,
5. ustanove za dnevni boravak korisnika socijalne zaštite.

ČLAN 82

U obavljanju djelatnosti ustanove ne smiju uspostavljati nikakva ograničenja u pogledu teritorijalne, nacionalne, vjerske, političke i bilo koje druge pripadnosti korisnika tih ustanova.

SAMOSTALNO OBAVLJANJE SOCIJALNE ZAŠTITE KAO PROFESIONALNE DJELATNOSTI

ČLAN 83

Samostalno obavljanje socijalne zaštite kao profesionalne djelatnosti obuhvata poslove savjetovališta i poslove pružanja pomoći i njege.

ČLAN 84

Poslove iz člana 84 ovog zakona može obavljati fizička osoba ako:

- ima odgovarajuću stručnu spremu,
- ima poslovnu sposobnost,
- ima zdravstvenu sposobnost za obavljanje djelatnosti,
- nije u radnom odnosu,
- raspolaže odgovarajućim prostorom i opremom.

Poslove iz člana 84 ovog zakona ne može obavljati osoba protiv koje se vodi istražni ili kazneni postupak ili je pravosnažno osuđena za kazneno djelo protiv života i tijela, protiv slobode i prava čovjeka i građanina, protiv dostojanstva osobe i morala, protiv braka, porodice i omladine.

ČLAN 85

Zahtjev za obavljanje poslova socijalne zaštite iz člana 84 ovog zakona podnosi se Odjeljenju koje rješenjem izdaje odobrenje za početak rada, nakon što utvrdi da su ispunjeni uslovi za rad propisani ovim zakonom i odgovarajućim podzakonskim aktima.

U slučaju podnošenja zahtjeva za proširenje djelokruga rada primijenit će se stav 1 ovog člana.

ČLAN 86

Fizička osoba koja samostalno kao profesionalnu djelatnost obavlja poslove savjetovališta i poslove pružanja pomoći i njege dužna je o početku, načinu i djelokrugu rada izvijestiti Centar za socijalni rad na čijem području djeluje.

Osoba iz stava 1 ovog člana u svom nazivu ističe ime i prezime, adresu nositelja djelatnosti i oznaku djelatnosti.

ČLAN 87

Odjeljenje će voditi evidenciju fizičkih osoba koje samostalno obavljaju profesionalnu djelatnost iz člana 84 ovog zakona kojima je odobrilo rad.

Sadržaj i način vođenja evidencije iz stava 1 ovog člana propisat će Odjeljenje.

ČLAN 88

Stručne poslove u savjetovalištu može obavljati radnik visoke stručne spreme društvenog usmjerenja koji ima najmanje tri godine radnog iskustva na istim ili sličnim poslovima.

Više osoba koje ispunjavaju uslove iz stava 1 ovog člana mogu osnovati zajedničko savjetovalište.

ČLAN 89

Poslove pomoći i njege može obavljati fizička osoba koja ima najmanje srednju stručnu spremu, a može zaposliti do tri radnika.

ČLAN 90

Fizička osoba koja samostalno obavlja socijalnu zaštitu kao profesionalnu djelatnost dužna je:

- pružati usluge u skladu s rješenjem Centra za socijalni rad,
- u obavljanju poslova socijalne zaštite iz člana 84 ovog zakona primjenjivati metode stručnog rada, poštovati odnos korisnika, njegovo dostojanstvo i nepovredivost ličnog i porodičnog života i čuvati profesionalnu tajnu,
- voditi evidenciju o pruženim uslugama,
- davati podatke o svom radu na zahtjev nadležnog Odjeljenja.

ČLAN 91

Rješenje za samostalno obavljanje socijalne zaštite kao profesionalne djelatnosti prestaje:

1. odjavom,
2. po sili zakona,
3. rješenjem nadležnog Odjeljenja.

ČLAN 92

Rješenje za samostalno obavljanje socijalne zaštite kao profesionalne djelatnosti prestaje po sili zakona ako osoba koja ima rješenje za rad:

1. umre,
2. izgubi potpuno ili djelimično poslovnu sposobnost,
3. zasnuje radni odnos s punim radnim vremenom,
4. bude pravosnažnom sudskom presudom osuđena za kazneno djelo koje predstavlja zabranu za samostalno obavljanje socijalne zaštite kao profesionalne djelatnosti, kao i kazneno djelo učinjeno u toj djelatnosti ili u vezi s tom djelatnošću,
5. izgubi opću ili posebnu zdravstvenu sposobnost za obavljanje poslova,
6. više od tri mjeseca ne podmiruje dospjele obavezne doprinose propisane posebnim zakonima.

Odjeljenje rješenjem utvrđuje prestanak samostalnog obavljanja socijalne zaštite kao profesionalne djelatnosti.

ČLAN 93

Odjeljenje donosi rješenje o prestanku samostalnog obavljanja socijalne zaštite kao profesionalne djelatnosti ako se nedostaci u obavljanju poslova utvrđeni inspekcijskim nadzorom ne otklone u određenom roku.

Rješenje o prestanku samostalnog obavljanja poslova socijalne zaštite iz stava 1 ovog člana Odjeljenje može donijeti i u slučaju:

1. ako osoba kojoj je izdato rješenje za obavljanje poslova ne obavlja poslove lično ili ako koristi rad drugih osoba suprotno odobrenju;
2. ako osoba kojoj je izdato rješenje prestane s radom bez dopuštenja nadležnog Odjeljenja;
3. ako i nakon upozorenja nadležnog Odjeljenja koje obavlja inspekcijski nadzor ne postupi u skladu s članom 91 ovog zakona.

ČLAN 94

Osobe koje samostalno obavljaju socijalnu zaštitu kao profesionalnu djelatnost mogu privremeno obustaviti poslovanje zbog bolesti ili drugog opravdanog razloga.

O privremenoj obustavi poslova mora se izvijestiti Odjeljenje i Centar za socijalni rad.

ČLAN 95

Osobi koja samostalno obavlja socijalnu zaštitu kao profesionalnu djelatnost Odjeljenje može povjeriti obavljanje dijela poslova iz člana 80 ovog zakona, a Centar za socijalni rad druge poslove u skladu s ovim zakonom.

Za obavljanje poslova iz stava 1 ovog člana Odjeljenje sklapa ugovor s osobom koja samostalno obavlja socijalnu zaštitu kao profesionalnu djelatnost.

Odjeljenje može ovlastiti Centar za socijalni rad za sklapanje ugovora iz stava 2 ovog člana.

ČLAN 96

Ustanove socijalne zaštite te fizičke osobe koje samostalno obavljaju socijalnu zaštitu kao profesionalnu djelatnost i u prostorijama u kojima vrše ovu djelatnost u vezi s uslovima korištenja komunalnih usluga i električne energije izjednačene su s domaćinstvom

NADZOR NAD STRUČNIM RADOM USTANOVA SOCIJALNE ZAŠTITE

ČLAN 97

Nadzor nad stručnim radom ustanova socijalne zaštite (u daljem tekstu: nadzor) ima za cilj unapređivanje stručnog rada, instrukcije i pravovremeno ukazivanje na nepravilnost i propuste u stručnom radu, radi preduzimanja odgovarajućih mjera potrebnih za sprečavanje ili otklanjanje štetnih posljedica.

ČLAN 98

Nadzor obavlja Odjeljenje, na osnovu programa koji će samo donijeti.

ČLAN 99

Nadzor se vrši stalno i sistematski uključujući neposredan uvid, kontrolu i druge oblike provjere ostvarivanja zadataka, odnosno načina organizovanja i primjene odgovarajućih stručnih postupaka i metoda na ostvarivanju pojedinih prava i oblika socijalne zaštite, kao i pružanje neposredne stručne pomoći.

ČLAN 100

Nakon obavljenog nadzora Odjeljenje podnosi izvještaj gradonačelniku u roku od 8 dana. Izvještaj obavezno sadrži:

1. prikaz utvrđenog stanja,
2. prijedlog mjera i rokovi za otklanjanje nedostataka,
3. prijedlog drugih mjera koje službenik s posebnim ovlaštenjima smatra neophodnim.

OSIGURANJE SREDSTAVA

ČLAN 101

Sredstva za ostvarivanje prava utvrđena ovim zakonom osiguravaju se budžetom Distrikta, kao i:

1. budžetom BiH,
2. doprinosima,
3. porezima,
4. donacijama,
5. i drugim načinima u skladu sa zakonom.

U pogledu primjene odredbi iz tačaka 2 i 3 prethodnog stava, gradonačelnik je ovlašten da donese odluku o privremenim stopama koje će se primjenjivati do donošenja odgovarajućih propisa.

U budžetu Distrikta osiguravaju se sredstva za materijalno osiguranje, doplatak za pomoć i njegu drugog lica, smještaj u ustanovu socijalne zaštite, smještaj u drugu porodicu, pomoć u kući, te usluge socijalnog rada i finansiranje ustanova socijalne zaštite za vršenje javnih ovlaštenja povjerena ovim zakonom.

U budžetu BiH osiguravaju se sredstva za izgradnju, adaptaciju, sanaciju i opremanje ustanova socijalne zaštite.

ČLAN 102

Sredstva koja se osiguraju u budžetu Brčko Distrikta BiH za funkcionalno osiguranje korisnika socijalne zaštite isplaćuju se direktno korisnicima.

Centar za socijalni rad dužan je da sredstva iz stava 1 ovog člana, pravda pravosnažnim rješenjem o priznatim pravima, kao i blagovremeno dostavljenim spiskovima korisnika potraživanja.

ČLAN 103

Ustanove socijalne zaštite stižu sredstva za rad izvršenjem programa socijalne, zdravstvene i odgojno - obrazovne djelatnosti, radnog osposobljavanja prema obimu i kvalitetu usluga i utvrđenim pojedinačnim cijenama i programom u cjelini.

Odnosi Odjeljenja i ustanove socijalne zaštite u pogledu prenošenja sredstava, korištenja smještaja i drugih pitanja od značaja za osiguranje prava na smještaj bliže se uređuju ugovorom.

ČLAN 104

Ustanove socijalne zaštite mogu sticati sredstva iz drugih izvora.

ČLAN 105

Odjeljenje propisuje kriterije i mjerila za utvrđivanje cijene usluga i utvrđuje cijene usluga za smještaj korisnika, u skladu s ovim zakonom, cijenom programa rada Centra za socijalni rad u dijelu poslova koji se odnose na vršenje javnih ovlaštenja, kao i cijenu programa za vršenje radnog osposobljavanja korisnika u odgovarajućoj organizaciji koja obavlja poslove osposobljavanja.

Odjeljenje propisuje kriterije i mjerila za utvrđivanje cijene usluga i utvrđuje cijene usluga u socijalnim ustanovama koje osniva Skupština Brčko Distrikta BiH.

KAZNENE ODREDBE

ČLAN 106

Novčanom kaznom od 500,00 KM do 1.000,00 KM kaznit će se za prekršaj ustanova ako:
- korisniku, protivno odredbama ovog zakona, uskrati ili ograniči prava koja mu pripadaju,

- omogućiti korištenje prava licu kome ne pripada pravo po ovom zakonu ili mu ne pripada u tom obliku,
- ne primi lice kojeg uputi Centar za socijalni rad,
- otpusti korisnika iz ustanove suprotno odredbama.

Za prekršaj iz stava 1 ovog člana kaznit će se i odgovorno lice u ustanovi, novčanom kaznom od 100,00 KM do 400,00 KM.

PRIJELAZNE I ZAVRŠNE ODREDBE

ČLAN 107

Svi korisnici koji su ostvarili pravo po Privremenoj odluci o socijalnoj zaštiti lica u stanju socijalne potrebe na području Distrikta, dužni su proći reviziju u roku od šest mjeseci, a postupci za ostvarivanje prava prije stupanja na snagu ovog zakona, a koji nisu završeni okončat će se po odredbama ovog zakona.

ČLAN 108

Odjeljenje će radi provođenja ovog zakona u roku od 6 mjeseci od dana stupanja na snagu ovog zakona donijeti odgovarajuće propise i opće akte iz svoje nadležnosti.

ČLAN 109

Postojeće ustanove koje obavljaju djelatnost socijalne zaštite, dužne su uskladiti i druge opće akte s odredbama ovog zakona u roku od 6 mjeseci od dana stupanja na snagu propisa iz člana 110 ovog zakona.

ČLAN 110

Ustanove socijalne zaštite dužne su uskladiti svoj rad i organizaciju i sve opće akte s odredbama ovog zakona u roku od 1 godine od dana stupanja na snagu ovog zakona.

ČLAN 111

Gradonačelnik će na prijedlog Odjeljenja i Odjeljenja za obrazovanje Vlade Brčko Distrikta Bosne i Hercegovine u roku od jedne godine od dana stupanja ovog zakona donijeti odluku o otkrivanju, ocjenjivanju sposobnosti, razvrstavanju i evidenciji djece i omladine ometene u psihičkom u fizičkom razvoju.

ČLAN 112

Odjeljenje će u roku od 1 godine od dana stupanja na snagu ovog zakona donijeti pravilnike o:

1. općim, tehničkim i stručnim uslovima za ostvarivanje i rad ustanova socijalne zaštite,
2. evidenciji i dokumentaciji koje vode službe socijalne zaštite,
3. uslovima za rješavanje stambene problematike.

ČLAN 113

Do donošenja propisa iz prethodnog člana primjenjivat će se:

1. Pravilnik o otkrivanju, ocjenjivanju i sposobnosti, razvrstavanju i evidenciji djece i omladine ometene u fizičkom i psihičkom razvoju (»Sl. list SRBiH« broj 33/86),
2. Pravilnik o općim, tehničkim i stručnim uslovima za osnivanje i rad ustanova socijalne zaštite (»Sl. list SRBiH« broj 12/72),
3. Pravilnik o evidenciji i dokumentaciji koju vode službe za socijalnu zaštitu (»Sl. list SRBiH« broj 12/72).

ČLAN 114

Danom početka primjene ovog zakona prestaje da važi Privremena odluka o socijalnoj zaštiti lica u stanju socijalne potrebe na području Brčko Distrikta BiH.

ČLAN 115

Ovaj zakon stupa na snagu 8. (osmog) dana od dana objavljivanja u »Službenom glasniku Brčko Distrikta BiH«.

Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТА

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

Broj:0-02-022-328/02
Brčko, 13. decembar 2002. godine

PREDSJEDNIK
SKUPŠTINE BRČKO DISTRIKTA

Mirsad Đapo, dipl. pravnik

This document was created with Win2PDF available at <http://www.daneprairie.com>.
The unregistered version of Win2PDF is for evaluation or non-commercial use only.